

Segun Rufo Kelly, na Aruba tambe tin problema social aki pero

Falta di respet den wega di bala ta sosode tur caminda



Rufo Kelly, Presidente di Arubaanse Voetbal Bond (AVB).

ORANJESTAD - Durante weganan di futbol e tension ta subi y aki ta pone cu e fanaticonan ta perde respet pa tanto hungadonan di team contrario, pa referee, pero tambe pa fanaticonan di otro ekipo. Adulonan ta lubida hopi biaha cu muchanan chikito tambe ta bay wak wega, y ta tende tur loke ta wordo bisa.

Segun Rufo Kelly, Presidente di Arubaanse Voetbal Bond (AVB), e problema cu nan tin cu e refereenan ta cu no tin hopi y p'e motibo aki tin biaha tin wega cu mester cancela of mester hunga sin linesman. Na e momento nan aki mes AVB tin dos referee cu ta lesiona, cual ta haci cu pa e weganan di AVB mes, dama y lifida no tin suficiente pa dirigi wega. E dos referee cu ta lesiona ta riba lista di FIFA, y e biaha aki Jason Colina a keda afo pa motibo cu otro aña e lo bira referee mes cu lo dirigi weganan di FIFA. Aña pasa Colina tabata un linesman di FIFA, pero pa e por a bira un referee di e or-

ganisacion e mester keda afo pa 1 aña.

Aparte cu AVB tin e dos referee lesiona, otro dos ta bayendo exterior pa un temporada largo pa atende na cursonan di referee. Kelly ta pidi pa clubnan pa manda un persona pa bira referee, pa asina e weganan por continua sin cu cada biaha mester pospone nan pa falta di referee. E ta sigui bisa cu nan mester rehenece e curpa di referee pa asina haci esaki mas fuerte. AVB tin un lista di mas o menos 30 referee, pero hopi di nan no ta activo.

E cantidad cu por ta presente na weganan ta aproximadamente un 20, pero e cantidad aki no ta suficiente compara cu e cantidad di weganan cu ta tuma luga di e diferente categorianan. Si AVB no haya refereenan nobo, tin e posibilidad cu nan lo haya problema pa e campeonato.

FANATICONAN

Na e competencianan cu ta



Logo di Arubaanse Voetbal Bond.

andando awo, e fanaticonan no ta yegando manera loke AVB ta spera. E bentaha di e aña aki AVB a cambia e sistema di clasificacion. Rufo ta bisa unda cu 10 team ta hunga, seis ta clasifica, y despues cuater te ora yega na e ultimo dos team cu lo hunga pa campeon y sub-campeon. Door di haci esaki e nivel di futbol lo bay ta mas halto cu e wega di campeonato mes, segun e Presidente di AVB. E ta kere haciendo esaki ta pone cu e weganan lo bira mas inte-

resante. Haciendo esaki unda cu ta pone e campeonato bira mas largo, fanaticonan por yega tereno pa apoya e teamnan.

Na exterior e organisacionnan ta castiga fanaticonan cu no ta mantene nan mes bunita na e weganan, y aki na Aruba tambe ta e caso. Segun Kelly, aña pasa AVB a prohibi dos persona pa no yega na e weganan di futbol pa motibo di nan conducta. Pero tambe nan sa schors fanatico y hungado

pa no yega na stadionnan pa un periodo basta largo. E organisacion di AVB ta tene cuenta cu tur e problemanan aki, pero nan no por controla esaki. Kelly mes ta haya e expresionnan mahos di e fanaticonan fastioso. Na otro paisnan tambe tin e mesun problema, pero e expresionnan aki no ta wordo scucha pa motibo cu mas fanatico ta atende na e wega y tin mas zonido. E Presidente di AVB ta pone enfasis cu nan tin atencion riba e problema aki. □



INTERUPCION DI CORIENTE

En conexion cu trabaonan necesario, coriente lo wordo interumpi: **diahuebs, 7 maart 2013 for di 8:30 a.m. te cu 4:00 p.m.**

den vecindario di:

- Savaneta (un parti)
- Rooi Koochi (un parti)
- Seroe Alejandro (un parti)



Pa mas informacion yama 523-7100 of e-mail nos via info@elmar.aw